

# ՄԵԼԳՈՆԵԱՆ ԿՐԹԱԿԱՆ ՀԱՍՏԱՏՈՒԹԵԱՆ

## «ԿՈՉ»

ԵՆՈՎՔ ՊԱԼԻՔԵԱՆ

Կ'ուզեմ արտայայտուիլ վերջերս հայ մամուլին մէջ լոյս տեսած Մելգոնեան Կրթական Հաստատութեան վերաբերեալ «Կոչ»ի մասին:

Կոչին վերնագիրը.- «Հայ Լեզուն ու ժառանգութիւնը վտանգի մէջ են» սարսափազդու, զգայացունց ահազանգ մըն է, ինչո՞ւ. Մելգոնեան Կրթական Հաստատութիւնը փակուեր է: Ուրախ ըլլալու ենք որ չեն ըսեր նաեւ որ Հայ ժողովուրդն ու հայրենիքն ալ վտանգի մէջ են: Կ'անարգեն, կ'արհամարհեն ամբողջ հայութիւնը ու կ'անտեսեն բազմահարիւր հայ վարժարանները աշխարհի չորս ծագերուն որոնք կը հովանաւորուին ազգային 3 կուսակցութիւններուն, մեր 3 յարանուանութիւններուն եւ զանազան բարեսիրական ու մշակութային կազմակերպութիւններուն կողմէ:

Մելգոնեան Կրթական Հաստատութիւնը փակուեցաւ 30 տարիներու լուրջ ուսումնասիրութիւններէ վերջ. ահա թէ ինչո՞ւ.- կրկին կը մէջբերեմ Կիպրոսի Հայկական Մամուլի «Ազատ Չայն»էն:

«Մելգոնեան Կրթական Հաստատութիւնը չի ծառայեր այլեւս իր գոյութեան նպատակին՝ Հայապահպանումին»: Դժբախտաբար Մելգոնեանը վերածուած է «հայապատկան» պարզ երկրորդական վարժարանի մը: Մենք բոլորս ալ հպարտ ենք ՀԲԸ Միութեան Մելգոնեան կրթական հաստատութեան փառապանծ անցեալով. սակայն վերջին 20 տարիներու ընթացքին արդեօք կարելի՞ է տալ անունները Մելգոնեանէն հայագետի մը կամ հայերէնի ուսուցիչի մը, խմբագիրի մը, կամ ազգային գործիչի մը՝ կամ՝ ազգային ղեկավարի մը: Կը կրկնեն Մելգոնեան Կրթական Հաստատութիւնը ժամանակներու պայմաններու բերումով ցաւալիօրէն այլեւս չի ծառայեր իր նպատակին:

Կրկին լսենք նաեւ թէ Մելգոնեան Կրթական Հաստատութեան տնօրէնուհին ինչ կ'ըսէ. «Մենք այդ աշակերտներուն հայերէն գրել կարողալ կը սորվեցնենք» երկրորդական գիշերօթիկ վարժարանի մէջ հայերէն գրել կարողալ սորվեցնել չէ Մելգոնեանի առաքելութիւնը. Ի միջի այլոց պէտք է իմանաք որ այսօր գիշերօթիկ ուսանողներուն իւրաքանչիւրին համար տարեկան մօտաւորապէս 10,000.00 տոլար կը ծախսուի. չեն ուզեր խօսիլ գիշերօթիկ երկսեռ վարժարանի մը անհատում դժուարութիւններու մասին այս դարու պայմաններուն մէջ: Իմացէք որ արեւելեան Եւրոպայի երկիրներէն եկող 10 աշակերտներու համար 100,000.00 տոլար պիտի ծախսուի ամէն տարի. մինչդէռ այդ գումարով 10 աշակերտի տեղ 1000 աշակերտի հայեցի դաստիարակութիւն կարելի է տալ, իր ծնած երկրին մէջ, իրենց ծնողներու հովանիին ու հսկողութեան տակ իրենց երկրին ուսումնական ծրագիրներուն ու պահանջներուն գոհացում տալով: Ուրախ ենք տեղեկացնելու ձեզի թէ Պուլկարիոյ մէջ իրականացած է այս ծրագիրը: Այսօր Պուլկարիոյ մէջ կան 3 ամենօրեայ հայկական վարժարաններ, 15-է աւելի շաբաթօրեայ դպրոցներ, հայկական ակումբներ, երիտասարդական կեդրոններ եւ ճամբարներ, ու Պուլկարահայութիւնը արդէն իր գործունէութիւններով կ'ապրի հայաշունչ մթնոլորտի մէջ: Ջգացումներով պէտք չէ առաջնորդուինք, գործնական, տրամաբանական եւ գիտական տուեալներու վրայ հիմնուելով պէտք է ծրագրուին մեր գործունէութիւնները ու մանաւանդ հայապահպանումը:

«Կոչ»ին մէջ յիշուած բոլոր մտահոգութիւններուն համար, որոնք երկար ժամանակներէ ի վեր ազգային մտահոգութիւններ են, միայն ՀԲԸ Միութիւնը առանձին՝ տարեկան 36 միլիոն կը յատկացնէ: Մեր Միութիւնը աշխարհի զանազան գաղութներու մէջ ունի 32 վարժարաններ եւ նիւթական օժանդակութիւն կը կատարէ 50 այլ հայկական վարժարաններու, հայագիտական կեդրոններու, որոնք կը հովանաւորուին մեր 3 կուսակցու թիւներու, մշակութային կազմակերպութիւններ եւ 3 ազգապահպանումի սրբազան առաքելութեան մէջ:

Իսկ այդ ինքնակոչ աղմկարար մարդիկը ի՞նչ ըրած են հայապահպանումի համար:

Այսօր, երբ ՀԲԸ Միութեան պատկառելի Կեդրոնական վարչութիւնը մեր ազգին գերագոյն եւ ընդհանրական շահերէն առաջնորդուած որոշած է աւելի գործնական ու օգտակար եւ արդիական ծրագիրներ իրագործել: Ի՞նչ տարօրինակ տրամաբանութեամբ այս մարդիկը կը պոռան թէ «Չէ՛, մենք պիտի որոշենք թէ Մելգոնեանը ինչ պէտք է ըլլայ եւ ուր, չէ՞ որ մենք շրջանաւարտ եղած ենք եւ վայելած վարժարանի բոլոր բարիքները ձրիաբար»: Չեն ուզեր աւելի երկարել եւ կ'ուզեն անցնիլ յաջորդ կէտին:

Ինչու այս կոչը.

Ստորագրութիւն հաւաքել որպէսզի ցոյց տան Կիպրոսի կառավարութեան որ ժողովուրդին բուռն փափաքին վրայ վերաբանալ տայ վարժարանը Կիպրոսի մէջ: Կարծեք թէ երգահանդէս մըն է եղածը. ուր երգիչը ժողովուրդին բուռն փափաքին վրայ կրկին բեմ կու գայ ու կ'երգէ. կամ թատրոն մը որ կը կրկնուի:

Պատկառելի Կեդրոնական վարչութեան անդամները, ազգային բարերարներ են, դպրոցներու, մշակոյթի եւ երիտասարդական կեդրոններու հիմնադիրներ են: Անոնք հեռատես, իմաստուն, զարգացած արհեստավարժ մասնագետներ են: Մելգոնեան Կրթական Հաստատութեան առաքելութիւնը վերակենդանացնելու, բոցա-վառելու եւ անմահ բարերարներու երազը յաւերժացնելու համար առած են այս որոշումը:

Ինչ կը վերաբերի Կիպրոսի բարեխնամ կառավարութեան անոնք գիտեն թէ դատարաններ իրեն յստակ վճիռը տուած են բազմիցս: Կիպրոսի կառավարութիւնը ձեր ստորագրութիւններուն ու քուէներուն պէտք չունի. դեմոկրատ կառավարութիւն մըն է եւ Եւրոպական Միութեան անդամ, անոնք շատ լաւ գիտեն օրէնքներն ու կանոնները ինչպէս նաեւ իրենց իրաւասութեան սահմանները:

Արդեօք այս մարդիկը կրնա՞ն պահ մը լրջանալ ու մտածել թէ ո՞վ պիտի ըլլայ շահողը. Կիպրական կառավարութիւնը, թէ աղմկարար անհատները որ կարենան ըսել (իրենց երագին մէջ) որ մենք յաջողեցանք անմահ բարերարներու երազը՝ Մելգոնեան Կրթական համալիրի իրականացումը յետաձգել, եւ կ'ակնկալեն որ ծափահարուին իրենց ազգավնաս գործին համար: Անոնք կ'արհամարհեն մեր ժողովուրդին իմաստութիւնը:

Մելգոնեան անմահ բարերարներու սկզբնական երազը եղած է Ակադեմիայի մը հիմնումը Հայաստանի մէջ, եւ այժմ ՀԲԸ Միութեան հեռատես եւ իմաստուն ղեկավարները կ'ուզեն իրականացնել այդ երազը Մայր Հայրենիքի մէջ որ միակ Սուրբ հողն է հայութեան, ուրիշ երկիրներ ասպնջական երկիրներ են միայն: Այս ծրագրի իրագործումն է որ պիտի ըլլայ գրաւականը ապահովելու հայ լեզուն, մշակոյթը եւ վերապրումը ու զարգացումը Սփիւռքի հայ համայնքներուն, ինչպէս նաեւ միջոցներէն մէկը ներկայ եւ ապագայ սերունդներուն ազգային ինքնութիւնը պահող:

Այս հայակերտումի Մելգոնեան կրթական համալիրը պիտի ծառայէ սփիւռքի բոլոր գաղութներու պատանիներուն ու երիտասարդներուն անխտիր:

Վերջացնելէ առաջ ըսեմ թէ այդ յայտարարութիւն «Կոչ»-ը ինձի ցաւ պատճառով լուր մը ունի: Ցաւ եւ զարմանք պատճառով լուրը այն է որ Եւրոպայի մէջ նուիրեալ միութենական, ազնուափայլ եւ յարգելի տիկին մը՝ ՀԲԸ Միութեան ղեկավարներու մի քանիներէն ներդուած՝ ո՞նի ու ատելութիւն ունի եղեր... վրժ առնելու համար ինք ալ միացած է այս աղմկարարներուն եւ սկսած է նիւթապէս օգնել իր նոր գործակիցներուն, մոռնալով որ ժխտական ու վնասակար ցեխարծակումները իր սիրելի Միութեան դէմ են եւ ոչ թէ իր չսիրած մարդոց: Յիշեցնենք իրեն թէ իր միութիւնն է որ յաւերժական է: Մեր թելադրութիւնը այն է այս մոլորեալներուն, որ դադարին աւելորդ մսխումներ ընելէ, եւ այդ ճիգն ու նիւթական տրամադրել ազգօգուտ ծրագիրներու:

Կը մաղթեմ որ այս մարդիկը հանդարտեցնեն իրենց կիրքերը, լրջանան, մտածեն ու միանան ՀԲԸ Միութեան ազնիւ ու ազգօգուտ նպատակին, որպէսզի իրականանայ Մելգոնեան անմահն Բարերար եղբայրներու երազը եւ շուտով կը կառուցէ Մելգոնեան Կրթական Համալիրը Մայր հողի վրայ եւ եկող սերունդներ հայօրէն թրծուին ու ներշնչեն արտասահմանի իրենց եղբայրներն ու քոյրերը:

ՀԲԸ Միութիւնը 103 տարուայ Բարեգործական Միութիւն մըն է եւ շատ համբերատար: Մի մոռնաք որ անհատներ ժամանակաւոր են եւ անցողական իսկ Հայկական Բարեգործական Ընդհանուր Միութիւնը ինչպէս նաեւ բոլոր հայկական ազգանպաստ կազմակերպութիւնները յաւերժական են որովհետեւ մեր Միութիւնը կը հաւատայ մեր ժողովուրդի ու հայրենիքի յաւերժութեան: